

LO FOLPOTAT

## LO FOLPOTAT

---

Note Jura, çât tot de meinme ĩn bé ptèt Cainton.

An on des vaïtches, des véés, des poûes, des dgerainnes, des tchvâs, des polains, des poûes-séyès, des tchevreûs, des téchons, di poûechon, des raînnés, é meinme des graibeusses.

Nos ains aîjebĭn des montaignes, des côtéés, des bôss, des saipĭns, des tchaimpois, des étaings, des saignes.

E yi è des touba, di biè, des pomattes é pe inco, de lai damè.

Mains djalou, un de nôs véjĭn de l'âtre-sen, en visite tchie nos, me diét d'ĭn air moquou :

Vos pèrmâttés, qu'i vos pôleuche ènne quèchtion; bĭn frain-tchement, laivoù sont vôs fleuves dâli ?

Lo niôlu, aivait tot boènnement rébiè " Lo Folpotat ".  
In fleuve ? Nâni; mains tot â pus, ènne petète r'viere aivô de l'âve é de lai boènne, que yi coule tos les djos l'annèe.

### EN LAI VAGUEYE D'ENNE VIRIE

E yi è inco taint de bés câres qu'an ne cogniât-pe dains note Jura, qu'i vos ĩnvite è me cheûdre, c'ment l'è fait un de mes bons aimi pai ĩn bé djo d'bontemps tot ensorayie, en ènne virie, que vos aimoéneré è faire cognéchaince de çte tchairmainne p'tête r'viere.

I vos promâs que vos vlèz être écâmi pai lai biâtè savai-dge des yûes, voû pèsse " Lo Folpotat".

Aiprès ènne boènne heure é demé de mairtche, nos airrivans és tchaimpois de " Lai Combe ", dôs lai Montaigne de Môtie. Ç'ât dains ènne saignatte djeûte en lai frontiere di cainton de Berne qu'ât lai dou di "Folpotat".

Nos ains ch'vè po montaie djeûque-li, è fait tchâd, è fait soi...

Lo bon voirre que nos ât servi â Cabaret de lai Combe, que s'trove droit ĩn pô pus hât, nos vait définmeu.

Aiprès aivoi étaintchie sai soi, èl ât conveni qu'an cheûdrait l'âve en r'déchendaint.

E fât dire que po graipinaie djeûque leûchus, nos aivĩns emprâtè lo tch'mĩn que londge les tchaimpois de lai Montaigne di Droit de Soulce en péssaint pai d'dôs les rotches de Folpotat. C'était pus aĩjie.

Aidonc, en paitchaint feûs de ci Cabaret, nos s'râtans en lai lisiere di bôs, aivô l'échpoir, ne faisaint pe de brut, de voûere péssaie ènne proûe de poûes-séyès.

An on vu des péssèes mains nian-pe de bêtes.

Les tchessous de lai rédigion cognéchant bĩn ci yûe, é po câse...

### EN CHEUYAINT LO FOLPOTAT

Dâs sai dou, é chu ènne londgeou d'è pô près mille mètres,  
Lo Folpotat n'ât-pe inco ènne r'viere, mains ĩn ru que nos  
cheûyans aivô poène, pai d'dains ènne combatte malaîjhere.

Mains ç'ât che bé è voûere, çt'âve que sâte d'ènne piere  
en l'âtre, en péssaint pai derie ĩn rotchèt po v'ni s'enfi-  
laie dôs ĩn trontchat. Li, èlle s'ât ĩn pô calmèe.

Mains n'ian-pe po longtemps lai voili r'paitchi de pus bèle  
en faisaint des dgierbes d'étieume qu'étiaiboussant ĩn véye  
pont de bôs tot moussru.

E nos voili airrivé en lai Combe és Loups.

Ci; è vât lai poène de s'aittairdgie ènne boussée.

Lo yûe ât calme, è paît lo mairmeugeaint brut de l'âve que  
cheût son couét, an ôt ran que les ôjés çhôttraie. Ç'ât quâsi  
ĩn câre de pairaidis.

Les copous yi aint loûete cabâne, ç'n'ât-pe ĩn hésâid s'èls  
aint tchoisi ci yûe.

Sietè chu ïn bainc, an ravoéte é an ôt...

Pairmé les saipïns, les boulas, les hêtés, les tchènes é âtres oeûjerâles, an peut vouère totes soûetches d'ôjés qu'an dirait po chûr qu'ès sont en fête.

E yi en è des grôs des p'têts de totes les couleurs che bés les uns que les âtres.

Nos étïns tchairmé pai lo roucoulement des bisets (colons de rotche) lo tchaint des coinçons, les falattes, les tiaimus, les méïses, les tchaidjoennerats, les voidjeûlattes ghiôttïnt taint, qu'an tiudait qu'ès se v'lïnt égajelaie. I n'saïs-pe dâli ce c'était po nos, mains Djéseusse, Mairia, qué concert...

Taindis que péssïnt en tchu de nos, ènne diejainne de boueres sâvaïdges, dous tchaitgairiats s'aimusïnt è s'ritaie ai-près en sâtaint d'ènne braince en l'âtre â bè mitan d'ïn grôs saipïn.

Mains lo temps pèsse é è nos en enchrât de tçhittie ci yûe tchairmou.

Mon aïmi m'è meinme aichurie qu'en lai boènne séjon, an yi poyait inco vouère des pous de bruyère.

Nos r'déchandans lai côte pairmé les rotches é quéques aïbres déraïcenès pai lo mâ temps, po r'trovaie " Lo Folpotat " â fond di terrâ, djeûte dôs ïn pont d'étiureû.

Mïntenaint qu'èl è bïn sâtè en décheudaint lai montaigne èl ât po chûr ïn pô sôle, mains è s'ât aïjebïn aigrôssi, d'âtres reuchelats veniaint di Mont-Aïdiu l'ètaint vni r'djoindre.

E ç'ât tot bailement aiprès aivoi r'pris son çhôçhe, tot c'ment nos, qu'è r'pait po porcheûdre son tch'mîn de lai sen de Soulce.

E n'ât-pe preussie, è s'en vaît bîn dgentiment en serpentaïnt, viraint è gâtche è droite, en-mé ci bé vâ tot çheûri. Aivô è gâtche lai Montaigne de lai Tchîevre é lo Domont, è droite lai Montaigne di Droit de Soulce.

Lo cie â bieu, lo soraye r'yut, les hélombrattes voulant hât, é dains l'hierbe tote frâtche di bontemps les violattes, les piadés, les pèrvaintches, és paip'ras biat doux piaïyie en dous, faint les eûyes migats.

Dains ènne çhériere, en l'ailombre des saipïns, en lai rive de lai r'viere, ènne piaïce ât aiyu emménaïdgie aivô tâles é baincs po lo pus grand piaïji des promenous é des dgens di câre.

Cheûyaint lai r'viere, paimé les tieudres çheuri é les sâcies an se râte devant les gos.

En ravoétaint bîn, en peut vouëre dains l'âve çhaïre, des traites que n's'étchâdant-pe piepe de nos.

E yi en è è foûejon, lai pâtche n'yi étaint-pe autorisée.

E fât dire que " Lo Folpotat " aippairtînt â Cainton é résavré po l'éyvaidge.

Mains i seus chûr, que mâgré tot, è yi en veut aidé aivoi quéqu'ènnés de cés belles traites, que v'lant manquaie â décompte.... é po câse....

L'âve de çte p'ète r'viere ât che prôpre, que les tchaivots, les té-raimès, les raînnès y poyant dgitaie è se r'prôdure. Aidonc, poquoi n'pe des graibeusses ?

Lo vâ s'élairdgi, é aivô lo tchaint des aillouattes, nos air-rivans és fèrmes di Folpotat.

Dichtainte l'ènne de l'âtre d'è pô près cent mètres, cés doûes fèrmes étĩnt aimôdièes pai lai tieumune de Soulce. Les dgens qu'yi d'morĩnt, tiultivĩnt les tieres qu'è yi aivait alentoué, en voidgeaint quèques bêtes en l'étâle. Fayaît-è en être aiffâti é aimaie son coénat po yi vétçhie.... Bĩn chûr que lai biâtè des yûes édait è faire boènne meûjure.

Adjed'heû, les tchamps sont devni tchaimpois é lai fèrme di hât ènne leudge.

Tiaint en l'âtre, çât ènne bèle mâjon très bĩn entretni, voû les dgens que l'aint aitchetès, vaint péssaie loûetes condgies.

Atoué de cés hôtâs, â son des sonnâyes, des vaitches, des dge-neusses, que les paiyisains aint botè feûe, tchaimpoiçant bĩn saidgement.

Nos tçhittans les yûes po porcheûdre note tchemĩn, aidé â long d'l'âve en l'aiveneûtche des tieudres é pairmé les çhoés.

Chu les hâtous, â droit, nian-pe bĩn loin d'lai r'viere, ĩn baint d'aîchattes bĩn piaicie dôs les saipĩns, en mé les çhoés, daît conveni défĩnmeu és aichattes que yi dmorant che bĩn qu'en çtu que s'en otiupe.

E paît quéques tchaîlats pair ci pai li, lai rédgiôn n'ât-pe  
inco envayi é ç'ât taint meu.  
Porvu qu'èlle demoreuche dînce .

Pus an déchend pus lo vâ s'élairdgi mains nian-pe "Lo Folpotat"  
qu'ât dmoré quâsi lo meinme.

E pèsse mîntenaint en mé les tchaimps tiultivès, aivô ènne  
nobyèsse qu'ât tot en son hanneur, é les coudris que vir'vou-  
lant en tchu de l'âve, che bèlles les ènnes que les âtres,  
sannant yi moïnaie fête.

Mains, c'ment îñ afaint poré bîñ aiyeutchi, è yi è des côps  
qu'è s'en vaît feûs d'son yêt po allaie tiuâtre lo bondjo en  
ennâvaint ses aimis Roquêts (Soucets).

E fât craîre que çoli n'yôs è-pe piaîju, pochqu'èls l'aint  
corridgie daïdroit.

Çoli è bèyie c'ment îñ p'tét lai, chu loquél aivô des tçhai-  
yos bîñ piait, nos nos aimusans è riselaie l'âve lo pus loin  
possibye.

Note virie toutche en sai fîñ. En airrivaint â yûe dit "Crêtes  
de Basolène" voû s'trove lai résavre d'âve de lai tieumune,  
nos voyans en lai lisiere di bôs dous bés tchevreûs aivô yôs  
p'têts, nian-pe épaïvurie di tot, tchaimpoyie lai tendre hier-  
be di bontemps.

E voili les premières mâjons di velaidge.

Lai poicherie, çât li que dains lo temps, lai poix était traiti.

In pô pus en aivâ, lai raîsse, qu'è eûsaidgie bîñ longtemps  
l'âve "di Folpotat" po faire è maïtchi sai savoure.

A mitant di velaidge, "Lo Folpotat" ât emprijenè dains ĩn canâ po faire virie lai rûe di melĭn.

Mains raichurites-vos è n'yi veut-pe demorè bĭn grant, è sré aichetôt-r'botè en libretè po porcheûdre en flaimaint dains ci vâ, djeuqu'è Endrevlie voû l'aittent son aimoi-reûse "Lai Sorne".

Vos peutes lo cheûdre, moi i seus sôle. I veus allaie aivô mon aimi, dains ĩn Cabaret di yûe, r'cegnie ènne indoye é boire ĩn bon voirre de vĭn. I crais que nos l'ains bĭn diain-gnie.

LES SAINTS DI FOLPOTAT

A Folpotat, tos les saints yi r'pojant.

Ç'ât : sains pain

sains sâ

sains sous

sains temps d'grâle.

Piepe ènne étchènne de bôs d'vaint l'hôtâ. E peu, se è  
yi è inco ĩn franc dains lai mâjon, an on ran qu'de ten-  
dre lo nèz pai lai f'nètre.

Voili v'ni çte tchairvôte de raîchetiuté que monte â long  
de l'âve po les v'ni raiméssaie.

Ah miedge de miedge....

Cĩntçhe que rentrant pai ènne pouêtcche, ché que paitchant  
pai l'âtre, miedge de miedge....

I les veus tos moinnaie en lai foire....



E ne fât djemaîs craire que lai tiere nos aipairtînt.  
 Mains, musaie pus tôt, que ç'ât nos qu'aippairtenians en lai tierre.  
 Dâs l'môment voû les hannes airaint compris çoli, bîn des tchôses  
 porînt tchaindgie.

En échpéraint que çoli n'feuche pe trop taîd.

Se i vos èz bèye envie de faire  
 cognèchaince aivô "Lo Folpotat",  
 r'viere de diamant, é de cés yûes  
 b'nâchu de Dûe, ç'ât taint meu.

Tâl était mon prépôs!

Lo groncenou.



**Soulce**

